

Auteur: Djoos Uytendale, pseudoniem pater Joris Declercq (Misschien geschreven in Uganda!)
Voorgedragen door Gerard Vermeersch

8. Van 'n VOS en de KROAJE

E boente kroaje, up ê koeden winterdag
Zat boov'n up ê sperreboom en zag
beneen, vo' 'n, veinster van Kamielt'n Boas
- vergeet'n of verloôrn – ê brokk' Ollândschn koas.

E peisde-ê- want 't was ê kroajevênt
"A'k doaeren kuste roak'n... 'k woa kontênt...
't Is wienter, en 'k ên oengr, en tut tut
't Is dom te loat'n legg'n 't gon daj pakk'n kut".
En zoe'er prakkezeren-êtwoa roent'n noen'n
Vloögt'n oel droain neere, lik de kroain dat doen
Schoepte' Ollandschen koas, en... weere up zyn tak
Peisnd'n doa binnen te speel'n up zyn doö gemak.

Mo... 't wo doar ook ë vossemoere dichtebie
die 't in de goat'n kreege, en in eën, tweë, drië
stoeg z'oen'er sperrboom woa dat'n krojeboas
djuste beguste bytt'n in zyn brokke koas.

"Oh la!" ankerde zo-oel vleien me fassoen-
"Oh la!" woar oal j'het gie om nog zo groöt te doen?
Je moe serieus ni vroeg'n oj bie kasse zyt
Gie die nog koas ku frett'n beist 'n krizistyd.

"Mo ja, 't is wâl êweet'n... verre enbie bekênd,
da kroajn luzoars zyn... en gie ê leëpen vënt
Me jun plumage meug je preus zyn lik ê pouw
Ze zyn wa simpl' zwort... mo ze blienken blouw.

'k Wuln wedd'n a'me most'n zing ên up tied
Daj garrentie maire êkooz'n zyt.
Doabie nog... nie ê mensche kutter ziengn lik gie
Ja zâwve 'n besten schanteur de Paris ê klopt je niet.

"Gow" zei ze "moat, doe m'nu êkeë plezier
en zientg – je ku gie dat – "Van Reuske komt olier'

'k Gon ort'n hier beneen... en stille bluuu'n stoan,
en oj êdoan ed uut beleefdheid up mien poöt'n sloan."

De kroaje peisde: joa'k, mo... (bei) wacht ê litje wei
En eëst oat'n zyn koas up... Toen begust'n d'r mei
... De Vossemoere keëk verbouwereerd na 't mos
Modasse doa zo fyn neur neuze ësnoot'n wos.

Wuk da je leërn kut, mensch'n uut myn rymelarie
Ort – 't is ên oede woarheid in ê woôrd tweë – drie

“Koet’n en klapp’n, ja doarin is’t ’t vro’vowk sterk
Mor... ot up ’t pakk’n ankomt... Dat is mannewerk.

(naar de La Fontaine)

Deze tekst verscheen in de gestencilde uitgave ‘Zo dragen wij voor in Frans-Vlaanderen’, *Gedichten uit Frans-Vlaanderen*, verzameld en uitgegeven door Werkgroep Nederland, Assebroek/Brugge, zonder jaartal.

Over pater Joris Declercq (1921-1981), alias Djoos Utendoale, ‘broussemissionaris’ in Burundi, zie o.a.

https://www.dbnl.org/tekst/ bie001200101_01/ bie001200101_01_0161.php;

<https://woutervanheiningen.wordpress.com/2013/10/25/joris-declercq/>;

<https://www.2dehands.be/v/boeken/godsdiens-en-theologie/m1654050528-nieuw-joris-declercq-denkend-aan-mark-deltour>; en

https://www.dbnl.org/tekst/ tie002201101_01/ tie002201101_01_0007.php (van Marcel Ryssen).

Met dank aan Wilfried Maes, die ons reeds in augustus 2001 op deze tekst wees.